

遼志目錄

本末

族姓原始

國土風俗

部落

倭今部落

兵馬制度

建官制度

宮室制度

衣服制度

漁獵時候

試士科制

歲時雜記

正旦

立春

人日

中和

上巳

佛誕日

端午

朝節

三伏

中元

中秋

重九



小春

冬至

臘月

詔盜

行軍

午日

旋風

舍利

跪拜

長白山

澤蒲

回鶻豆

螃蟹



國家圖書館, NATIONAL CENTRAL LIBRARY, TAIWAN, R.O.C

遼志

元 葉隆禮 撰
明 吳瑄 校

本末

契丹之始也中國簡冊有所不載遼夷草昧復無書
可考其年代不可得而詳也本其風物地有二水曰
地也里沒里復名陶猥思沒里者是其一也其源出
自中京西馬盂山東北流華言所謂土河是也曰梟
羅箇沒里復名女古沒里者又其一也源出饒州西
南平地松林直東流華言所謂潢河是也至木葉山

合流爲一古昔相傳有男子乘白馬浮土河而下復有一婦人乘小車駕灰色之牛浮潢河而下過於木葉山顧合流之水與爲夫婦此其始祖也是生八子各居分地號八部落一曰祖皆利部二曰乙室語部三曰實活部四曰納尾部五曰顛沒部六曰內會雞部七曰某解部八曰奚唄部立遺像于木葉山後人祭之必刑白馬殺灰牛用其始來之物也後有一主號曰迺呵此主特一髑髏在穹廬中覆之以氊人不見得見國有大事則殺白馬灰牛以祭始變人形出視事已卽入穹廬復爲髑髏因國人竊視之失其所在

復有一主號曰嗚呵戴野猪頭披野豬皮居穹廬中有事則出退復隱入穹廬如故後因其妻竊其豬皮遂失其夫莫知所如次復又一主畫里昏呵惟養二十口日食十九留其一焉次日復有二十口如是三主者皆有能治國之名餘無足稱焉異矣哉氊中枯骨化形治事戴猪首服豕皮罔測所終當其隱入穹廬之時不知其孰爲之主也孰爲之貳副也荒唐怪誕訛以傳訛遂爲口實其詳亦不可得而詰也自時厥後牛馬死損詞訟龐淹復遭風雨雪霜之害中遂衰微八部大人後復稍整兵三年一會於各部

內選雄勇有謀略者立之爲主舊主退位例以爲常至阿保機爲衆所立後併七部而滅之契丹始立其國大原興自阿保機至耶律德光而浸盛遭五季之衰天末厭亂石晉胎釁產禍諸華毒痛四海飛揚跋扈貪殘僭擬中國帝王名數盡盜有之冠履倒植薰蕕共染干戈之慘極矣迨宋眞宗屈已和戎不復以一矢相加含容覆護百有餘年聖興道三主以來天誘其衷革心慕義貪婪歲幣顧惜盟好銷鋒寢柝號稱無事南北皆不知兵各保首領以沒茲非以德懷遠之明效與祖宗列聖之德可謂至哉若遼之威服諸夷奄有全燕何其強也天祚昏辱女眞啓心深入一呼土崩瓦裂何其弱也且兵者不祥之器也天道好還盛極而微理固然也故其興也勃焉其亾也忽焉悲夫今撫舊聞哀其本末雖未能考其異而訂其同要之大略其不相遠後之英主忠臣志欲溯今涸古可以爲鑒矣

族姓原始

契丹都部族本無姓氏惟各以所居地名呼之婚嫁不拘地里至阿保機變家爲國之後始以王族號爲橫帳仍以所居之地名曰世里著姓世里者上京東

通志
二百里地名也復賜后族姓曰蕭氏番法王族惟與后族通婚更不限以尊卑其王族后族二部落之家若不奉北主之命皆不得與諸部族之人通婚或諸部族私相婚嫁不拘此限故北番惟耶律蕭氏二姓也

國土風俗

契丹國在庫莫奚東唐所謂黑水靺鞨者今其地也有七十二部落不相統制好爲寇盜父母死而悲哭者以爲不旺但以其屍置于山樹上經三年後方取其骨而焚之因酌酒而祝曰冬月時而陽食我若射獵時使我多得豕鹿其無禮頑囂於諸夷最甚其風俗與奚靺鞨頗同至阿保機稍并服諸小國而多用漢人漢人又教之以隸書半增損之作文字數千以代刻木之約又制婚嫁置官號稱皇帝

部落

漢時爲匈奴所破保鮮卑山魏青龍中部酋爲王雄所殺衆遂逃橫水之南黃龍之北至元魏自號曰契丹在唐開元天寶間使朝獻者無慮二十故事以范陽節度爲押奚契丹使唐末契丹始盛

併今部落

初契丹有八部族之大者曰大賀氏後分爲八部部
之長號大人而常推一人爲王建旗鼓以統八部每
三年則以次相代或其部有災疾而畜養衰耗則八
部聚議以旗鼓立其次而代之被代者以爲元約如
此不敢爭及阿保機乃曰中國之王無代主者由是
阿保機益以威制諸國不肯代其立九年諸部共責
誚之阿保機不得已傳其旗鼓而謂諸部曰吾立九
年所得漢人多矣吾乃別自立一部以爲漢城可乎
諸部許之漢城在炭山東灤河上有鹽鐵之利乃後
魏滑鹽縣是也其地可植五穀阿保機率漢人耕種
爲治城郭邑屋廛市如幽州制漢人安之不復思歸
阿保機知衆可用用其妻述律策使人告諸部大人
曰我有鹽鐵之利諸部所食然諸部知食鹽之利而
不知其鹽有主人可乎當來犒我諸部以爲然共以
牛酒會鹽池阿保機伏兵其旁俟其酒酣伏兵發盡
殺諸部大人復併爲一國東北諸夷皆畏服之

兵馬制度

晉末契丹主部下兵謂之大帳有皮室兵約三萬騎
人皆精甲兵也爲其爪牙國母述律氏部下謂之屬
棚有衆二萬是先戎主阿保機牙將半已老矣每南

來時量分借五千騎述律氏常留數百兵爲部落根本其諸大酋領太子偉王永康南北王子趙麻答五押等大者千餘騎次者數百人皆私甲也別族則有奚霄勝兵亦千餘人少馬多又有渤海酋領大舍利高模漢兵步騎萬餘人竝髡髮左衽竊爲契丹之飾復有近界韃靼于厥里室韋女真党項亦被脅屬每部不過千餘騎其三部落吐渾以阨陌幽州管內鴈門以北千餘軍州部落兵合三五萬餘衆此是石晉割賂契丹之地番漢諸族其數可見矣每契丹南侵其衆不啻十萬國主入界之時步騎車帳不從阨陌東行一槩而行大帳前及東西面差大首領三人各率萬騎支散游變百十里内外相覘邏謂之欄子馬戎主吹角爲號衆則頓舍環遶穹廬以近及遠折木稍屈之爲弓子輔不設槍營塹柵之備每行軍聽鼓三伐不問昏晝一布便來行逢大敵不乘戰馬俟近敵師卽競乘之所以新羈戰馬蹄有餘力其用軍之術成列而不戰俟退而乘之多伏兵斷糧道隨冒夜舉火上風曳柴積餉自齎退敗無恥散而復聚寒而益堅此其所長也

建官制度

賤他姓貴耶律蕭氏二姓其官有契丹樞密院及行
官都總管司謂之北面以其在牙帳之北以主番事
又有漢人樞密院中書省行官都總管司謂之南面
以其在牙帳之南以主漢事其陽隱宗正寺也夷齊
畢參知政事也林牙翰林學士也夷齊中刺史也內
外官多做中國者其下佐吏則有敝史本古思奴古
都奴古徒奴古分領兵馬則有統軍侍衛控鶴司南
王北王奚王府王帳分提失哥東西都省太師兵又
有國舅軫轄膳遙輦裳裘諸司南北皮室二十部族
節度頻必里九克漢人渤海女真五節制五治火帥

一百六日九百家矣凡民年十五以上五十以下皆
籍爲兵時舉兵必殺灰牛白馬祠天地及木葉山神
鑄金魚符調發兵馬其從馬及傳命有銀牌二百軍
所舍有遠探欄子馬以夜聽人馬之聲每其立衆所
得人戶馬牛金帛及其下所獻牲口或犯罪沒入者
別爲行官領之建州縣置官屬旣死則設大穹廬鑄
金爲像朔望節辰忌日輒致祭築臺高丈餘以盆焚
食謂之燒飯

宮室制度

十宮各有門戶出兵馬阿保機曰洪義宮德光曰永

興宮兀欲曰積慶宮述律曰延昌宮明記曰章敏宮
突欲曰長寧宮燕燕曰崇德宮隆緒曰興聖宮隆慶
曰敦睦宮隆運曰文忠宮王府又有四樓在上京者
曰西樓木葉山曰南樓謂化州曰東樓唐州曰北樓
凡受冊積柴升其上大會番夷其下已乃燔柴告天
而漢人不得預有諱子部百人夜以五十人番直四
鼓將盡歌於帳前號曰聒帳每謁木葉山卽射柳枝
諱子唱番歌前導彈胡琴和之已事而罷

衣服制度

國母與番官胡服國主與漢官卽漢服番官戴氍毹冠
上以金華爲飾或以珠玉翠毛蓋漢魏時遼人步搖
冠之遺像也額後重金金花織成夾帶中貯髮一總服
紫窄冠帶以黃紅色條裹革爲之用金玉水晶碧石
綴飾又有冠如紗帽無簷不撤雙馬額前綴金花上
結紫帶末綴朱或紫阜幅巾紫窄袍束帶丈夫或綠
中單綠花窄袍中單多紅綠色貴者被貂裘以紫黑
色爲貴青色爲次又有銀鼠尤潔白賤者被貂毛半
鼠沙狐裘弓以皮爲弦箭削楛爲幹韃勒輕快便于
馳走以貂鼠或鵝頂鴨頭爲捍腰宋真宗景德中太
常博士王曙戶部員外郎李維往賀國主生辰還言

國主見漢使彊服衣冠纔已卽帳中雜番騎出郊射獵矣

漁獵時候

每歲正月上旬出行射獵凡六十日然後竝撻魯河鑿水釣魚水畔卽縱鷹鶻以捕鵝鴈夏居炭山或上京避暑七月上旬復入射鹿夜半令獵人吹角倣鹿鳴鹿旣集而射之宋真宗時遣使往賀生辰還言始至長泊泊多野鵝鴨國主射獵領帳下騎擊扁鼓遶泊驚鵝鴨飛起乃縱海東青擊之或親射焉國主皆佩金玉錐號殺鵝宰鴨錐初獲卽拔毛插之以鼓爲坐遂縱飲酒醉以此爲樂又好以銅及石爲槌以擊兔每秋則衣氊裘呼鹿射之夏月以布爲氊帳籍毯圍碁雙陸或深澗洗鷹

試士科制

太祖龍興朔漠之區倥偬干戈未有科目數世後承平日久始有開闢制限以三歲有鄉村省三試之設鄉中曰鄉薦府中曰府解省中曰及第時有秀才未願赴者州縣必報刷遺之程文分兩科曰詩賦曰經義魁各名分焉三歲一試進士貢院以二寸紙書及第者姓名給之號喜帖明日舉按而出作樂及門擊

鼓十二面以法雷震殿試臨期取旨又將第一人特贈一官授奉直大夫翰林應制奉文字第二人第三人止授從事郎餘竝授從事郎聖宗時止以詞賦法律取士詞賦爲正科法律爲雜科若夫任子之令不論文武竝奏蔭亦有負數

歲時雜記

正旦

正月一日國主以糯米飯白羊髓相和爲團如拳大於逐帳內各散四十九箇候五更三點國主等各於本帳內牕中擲米團在帳外如得雙數當夜動番樂飲宴如得隻數更不作樂便令師巫十二人外邊遶帳撼鈴執箭唱叫於帳內諸火爐內爆鹽并燒地拍鼠謂之驚鬼崇帳人第七日方出乃解禳之法北呼此謂之姦担離漢人譯云姦是丁担離是日

立春

立春日婦人進新春書以黃繒爲幟刻龍像銜之或爲蝦蟆

人日

人日京都人食煎餅於庭中俗云薰天未知何所從出也

中和

二月一日大族姓蕭者竝請耶律姓者於本家筵席此節爲瞎里討漢人譯云瞎里是請討是時

上巳

三月三日國人以木雕爲兔分兩朋走馬射之先中者勝其負朋下馬跪奉勝朋人酒勝朋於馬上接盃飲之北呼此節爲淘裏化漢人譯云淘裏是兔化是射

佛誕日

四月八日京府及諸州縣各用木雕悉達太子一尊城上昇行放僧尼道士庶民行城一日爲樂

端午

五月五日午時采艾葉與綿相和絮衣七事國主著之番漢臣僚各賜艾衣三事國主及臣僚飲宴渤海厨子進艾糕各點大黃湯下北呼此時爲討賽離又以雜絲或綠結合歡索纏于臂膊婦人進長命縷宛轉皆爲人象帶之

朝節

夏至日婦人進扇及脂粉囊謂之朝節

三伏

六月十八日大族耶律姓竝請蕭姓者亦名瞎里討

中元

七月十三日夜國主離行宮向西三十里卓帳先于彼處造酒食至十四日一應隨從諸軍竝隨部落動番樂設宴至暮國主却歸行宮謂之迎節十五日動漢樂大宴十六日早却往西方令隨行軍兵人大噉三聲謂之迎節此節謂賽離拾漢人譯云賽離是月拾是好是月好也

中秋

八月八日國主殺白犬於寢帳前七步埋其頭露其嘴後七日移寢帳於埋狗頭上北呼此節爲担褐孛漢人譯云担褐是狗孛是頭

重九

九月九日國主打團斗射虎少者輸重九一筵席射罷於地高處卓帳與番漢臣登高飲菊花酒出兔肝切以生鹿舌拌食之北呼此節爲必里遲離漢人譯之云九月九日也又以茱萸研酒灑門戶間辟惡亦有入鹽少許而飲之者又云男摘二九粒女摘一九粒以酒嚥者大能辟惡也

小春

十月內五京進紙造小衣甲并鎗刀器械各一萬副十五日一時進梁國主與押番臣密望木葉山奠酒拜用番字書狀一紙同焚燒奏木葉山神云寄庫北呼此時爲戴辨漢人譯云戴是燒辨是甲

冬至

冬至日國人殺白馬白羊白鴈各取其生血和酒國主北望拜黑山奠祭山神言契丹死魂爲黑山神所管又彼人傳云凡死人悉屬此山神所管富民亦然契丹黑山如中國之岱嶽云北人死魂皆歸此山每歲五京進人馬紙甲各萬餘事祭山而焚之其禮甚嚴非祭不敢近山

臘月

臘月國主帶月戎裝應番漢臣諸司使已上竝戎裝五更三點坐朝動樂飲酒罷各等第賜御甲羊馬北呼此節爲抄離時漢人譯云抄離是戰時是戰時也

詔盜

五月十三日放國人作賊三日如盜及十貫以上依法行遣北呼爲鶻里時漢人譯云鶻里是偷時是時也

行軍

契丹行軍不擇日用艾和馬糞於白羊琵琶骨上灸
灸破便出行不破卽不出

午日

契丹出軍每遇午日起程如不用兵亦須望西大喊
三聲行之彼言午是北朝大主之日

旋風

契丹人見旋風合眼用鞭望空打四十九下口中道
坤不刺七聲

舍利

契丹國內富豪民要裹頭巾者納牛駝十頭馬百疋
并給契丹名目謂之舍利

跪拜

凡男女拜皆同其一足跪一足著地以手動爲節數
止於三四彼言捏骨地者卽跪也

長白山

長白山在冷山東南千餘里蓋白衣觀音所居其山
內禽獸皆白人不敢入恐穢其間以致蛇虺之害黑
水發源于此舊云粟末河太宗破晉改爲混同江其
俗剝木爲船長可八尺形如梭子曰梭船上施一槃

止以捕魚至渡車則方舟或三舟

澤蒲

西樓有蒲瀕水叢生一葉如柳長不盈尋丈用以作箭不矯作而堅左氏所謂董澤之蒲是也

回鶻豆

回鶻豆高二尺許直幹有葉無旁枝角長二寸每角止兩豆一根才六七角色黃味如粟

螃蠯

渤海螃蠯紅色大如碗螯大而厚其脆如中國蠯螯巖舉鮫魚之屬皆有之

遼志終